

周

易

象

義

天行健君子以自強不息

天行健天不可得而名自其德而名之曰乾乾健也謂之行者何也天氣而已矣地之四面上下皆天也皆氣也氣之運行大無不包小無不入無一非天之行而行之所以不息者惟其德之健耳其度數周天三百六十五度餘從開闢以來一日一周無一息停此天行也此健也萬物資始流行各正保合此天行也此健也君子觀乾象而行必法天其何以法之哉人奉天地之心形色天性也易知可久即乾知之不息也人之行非取必於天之

健惟自強不息則陽明與天同運而天德在我矣  
是故天命之性本自剛健中正本自純一不已吾  
惟立吾毅然之志養吾浩然之氣盡吾本然之性  
日而乾馬夕而惕馬學聚而問辨寬居而仁行焉  
庸言必信庸行必謹固不離乎日用常行之內知  
至至之知終終之直欲造乎先天未畫之前元亨  
利貞孜孜乎法天以並運潛見飛躍臺臺乎與時  
而偕行樂行憂違知進知退雖用九見天則不敢  
一毫作為其間而一息尚存此志不容少懈必期  
天且弗違而後已是無聲無臭天之行也不可窺

勿助勿忘我之行也必有似此君子自強不息上  
達天德之學也天命之性本如是君子盡性致命  
无一息不與天地日月四時鬼神合焉一皆盡性  
之能事耳豈能於自性之天加毫末哉故真知易  
者只一健字盡之矣真能法天者只自強不息一  
語盡之矣觀孔子木天縱至聖猶不厭不倦發憤  
忘食不知老之將至此乃乾健自強之準則也嗟  
夫人人皆天也氣息一呼一吸與天同運並行而  
神氣不能主宰咸自違其天則自棄其天德而悖  
天亦甚矣有志希聖希天者何莫不自強哉自即

乾也象必云以者君子之用易也

乾一也在天曰健在人曰強觀君孔子以強語子  
路如流中立不倚國有道不變塞國無道至死不  
變塞焉而屢贊其強可見自強之道豈氣魄才力  
云乎哉

地勢坤君子以厚德載物

地勢坤地謂之勢以形言也上坤下坤一高一下  
平阪相因層積不墮其形勢何其渾龐磅礴而萬  
物悉賴之以載職者厚之至也厚坤德也故云地  
勢坤君子觀象於地勢以厚德載物卑法地也夫

品物覆之於天者莫不載之於地中庸曰及其廣  
厚載華嶽而不重振河海而不洩萬物載焉是也  
博厚配地者君子自任以天下之重也使德不如  
地則萬物皆備於我其何以勝之然地之所以厚  
載者以其墮然處萬物之下也君子欲卑法地而  
不能慮以下人奚可哉是故德性之厚木淳龐而  
不瀉敦厚之功宜渾淪之日積以一身負此萬類  
而不見其為重以一身承藉百為而不見其為繁  
翁之萬物歸其根淵淵其莫測闕之萬物鼓其化  
浩浩其無涯雖體物不遺不能於德性有所加而

吾之德大莫能載則倫物如彼其衆而類聚群分  
錯綜變化優優乎載之有餘地矣是坤厚載物德  
合無疆固由夫地勢之順厚德載物應地無疆斯  
成其質化之能配天者地也配地者君子也否則  
一獲不獲一物失所君子以為予辜豈作而致其  
情哉仁者與物同體躬自厚之道本如是也雖然  
德不積不厚又惡容已於自強不息之功哉惟合  
而觀之自強不息則天地備厚德載物則王道全  
雲雷屯君子以經綸

雲雷屯陽蒸陰則陰氣騰而為雲陰鬱陽則氣陽

奮而為雷二氣和則雨然而謂之屯者時乎雷動  
雲合二氣絪縕滿空中畜聚未散將以致雨而尚  
未雨也故為屯之象當此屯塞之時正君子大有  
為之日也欲以開物成務而未嘗殫心思以為之  
經營則寡謀淺慮其何能濟于焉以經世之責任  
諸已而施為措置變化無窮不得不勞心焦思夜  
以繼日以酬酢之故繳謀締慮細緝畝維如治絲  
者務欲解散其絲結以為纖維之用既理其緒而  
為之分又比其類以為之合法雷之振而莫不得  
其理法雲之合而一皆統其同凡所以緝績等度



於冑中者固不辭乎屯蹇之勞而析理務極其精  
於事務盡其變必使一經一緯成就其緒而後已  
故操深慮危其德慧術智自尔深沈縝密雖萬感  
萬應真有析衝搏祖者在矣否則不曰如之何如  
之何則慮不逮者憂必近况於經世宰物哉可見  
經綸者君子之雲雷也雲雷屯則醞釀濃然後足  
以霖雨乎天下經綸密則思慮熟然後足以燮理  
乎化機

學而不思則固而固心術慮即學者之屯也聖人  
經綸大經如周公思兼三王其有不合者仰而思

之夜以繼日亦是此意

山下出泉蒙君子以果行育德

山下出泉蒙山者泉之源也山出乎泉而尚無所  
汨泉出於山而尚未之行蒙之象也是純一無雜  
之謂蒙非昏蒙之謂也君子觀象於蒙以果行育  
德何也行雖有漸而百折必東者泉之流也發源  
有自而精潔未汚者泉之體也可見泉雖在山已  
有必行之機惟順以導之自有放海之勢故君子  
思以開其德行之蒙也體坎之剛中以果決其行  
體艮之靜止以養育其德必欲小德川流而行陰

注海沛然其莫阻大德敦化而端木澄源淵然其  
莫窺如此則海涵春育源深流長功雖極其奮勵  
而本真未漓機惟順其自然而源流不息何敢用  
智以鑿其混沌之天乎亦非有意以調停之也天  
命之性即山下之泉也蒙以養正乃盡性之學也  
允體之於行雖遇險而務竭其當然之力會之於  
心必智止以順其本然之真如此則溥博淵泉固  
盡性之極效果行育德實作聖之全功所謂大人  
不失赤子之心是也赤子本濇濇未判大人則德  
行渾全而盡其功正以復其初耳否則徒恃人為

之矯強而不循乎天性之本然豈聖人果育之教哉

雲上於天需君子以飲食宴樂

雲上於天需水氣蒸而為雲陰陽和而後雨雲既上於天則天氣亦下降矣雖未成雨而雨可需也故為需之象君子懷才抱德其綏來動和具已在我則時未亨而亨可待矣果何所為哉蓋道不出乎日用常行之外而百姓日用不知者由其行不著習不察耳所以道在通而求諸遠事在易而求諸難未免越分貪奇行險徼福自離乎中庸之道也

殊不知飲食養中以象夫坎宴樂舒泰以象夫乾  
乃其日用不可離者况萬物所需莫大乎潤澤喜  
人所需莫切乎居食而飲食宴樂即道之所在也  
九五需於酒食貞吉象謂以中正是也故觀君子  
之心汲汲皇皇未嘗一日忘天下而曲肱蔬食樂  
在其中陋巷簞瓢不改其樂用行舍歲我何與也  
所以居易俟命歲器待時道固當如是耳由是作  
霖雨慰雲霓亦取諸飲食宴樂中有餘裕也可見  
雲上於天已有可需者在而君子之需時得非素  
位而行而安其見在所需之常乎乃若身係蒼生

之望而沈酣寄興遊宴怡情則又需之似是而實  
非者不可不察

天與水運行訟君子以作事謀始

天與水運行訟天生水其始也木同一氣天固  
元氣之渾淪水即精氣之融液天水本一也一動  
之後天道上行水性下潤天運左旋水流東注其  
行相違遂有天淵之隔矣君子觀象知訟者公言  
其所行也訟之所由興者雖行違於終實始謀之  
不慎耳或以是非求勝其畧別于毫芒或以利害  
相攘其隙開于微眇如女子爭桑而吳楚運兵羊

斛爭羊而宋師撓敗蓋可鑒也是故天下無理外  
之事善作事者本吾同然之心協吾當然之理即  
於始焉謀之真見吾人自一体之親以至四海之  
內其初本同氣而生不相違悖猶天一之水也惟  
其事勢一交不免以己意作為于其間則是非利  
害之心犁然分而爭訟興矣事未作而彼此同心  
事一行而形迹兩判合則四海皆兄弟違則父子  
若仇讐良可畏哉其必謀於未作之先不至無知  
而妄作故作於既謀之後庶幾好謀之有成雖有  
事而常行其所無事焉而欲慎厥初惟其始也不

可以片言起霧不可以纖芥睽情塞憤爭之源杜  
好勝之實凡所以謀諸始者一歸諸道義而訟端  
息矣此固無訟之道也噫謀始不至于訟人而反  
始莫要於自訟

地中有水師君子以容民畜衆

地中有水師水由地中行其所以容蓄乎水者地  
也然則地勢本下水之四面來歸者無窮水流不  
停地之萬派畢受者無量君子觀其象得容民蓄  
衆之道焉水聚于地兵寓于農其象一也何也畫  
地居民八家同井疆理畝畝之內莫非塗澮溝洫



之分比問族黨之間一皆卒伍軍旅之衆容之而  
有所居畜之而有所養無事則荷耒耜以務農而  
撫綏必周一皆坤之順也有事則執戈盾以講武  
而訓練有法一如坎之險也伏至險于大順古之  
兵農合一井田法制固如此也所以民皆知兵不  
必調兵以擾民兵自足食亦不必賦民以養兵矣  
豈強制之哉民之歸仁猶水之就下所以容而畜  
之者順乎水與民之性也水聚於地中則無泛濫  
之虞兵隱於民井田則無判亂之禍  
觀禹貢河水伏流潛行地中固可以得師之象而

於容民蓄衆之義愈覺親切

地  
上有水比先王以建萬國親諸侯

地上有水比地之與水本不容間大而江淮河漢  
小而溝澮行潦容納者地之比夫水潤澤者水之  
比夫地雖一撮一勺之多彼此澆洽而物之相比  
莫過水與地也先王象比以建萬國親諸侯蓋王  
者能以一人統天下不能以一人身親乎萬民知  
民各有君君各有國而五家為比乃建國分封之  
原也於是建之國有百里七十里五十里與附庸  
之別焉主之君有公侯伯子男之殊焉小大相制

衆寡相維如溝澮之納江河江河之歸于海漬隨  
其水之交流派分莫不與地相比也豈徒使之各  
守疆地而假富貴以比夫諸侯已哉天下有分土  
無分民也使之各君其國子其民天子建萬國以  
親諸侯諸侯率萬民以比天子巡狩述職翕然上  
下之相親如水地相比而無間然矣如彼而有後  
夫焉天下其誰容之

水分則勢弱而地安水合則勢強而地窳觀古今  
黃河之分合可以知分封之道矣

比獨曰先王可見封建之制其來遠矣

唐虞萬國衆建而少其力則多助而易制周之國  
千有八國漸蕪併也國併則土廣故勢均力敵交  
相侵奪民不聊生是周之初封侯國已非萬國之  
制矣又何恠春秋戰國併為七雄而終吞於強秦  
耶

風行天上小畜君子以懿文德

風行天上小畜天太陽氣之上浮而風亦氣也巽  
取一陰在下虛而為風忽然而來飄颻大空卷浮  
雲蕩陰霽皆其行于天上之象也若指蒼蒼之體  
則天豈有上抑豈風之所能畜乎但風行天上以

陰畜陽所畜者小故為小畜然而謂之文德之美者何也風以陰柔之氣拔拂虛空倏而晴倏而陰倏而光風之可玩倏而飄風之可驚雖不足以盡天文之美而此亦一端之可見者是故君子觀小畜之象以懿文德彼德之畜于中者未易窺文之炳於外者不可掩凡布於威儀言詞而文筆為之煥發著於詞命訓典而章美為之敷宣皆文也皆德之可美者也惟文本於德不徒為掇英剡華之末而德見於文亦足為章身華國之資如此則文德之畜聚一大空之變態而郁乎美哉文風其日

上天下澤履君子以辨上下定民志

上天下澤履天尊地卑乾坤定矣卑高以陳貴賤位矣然以澤視天則在下之卑之卑者夫固天地自然之限制也君子觀履之象于以辨上下定民志夫民志何以不定由上下未辨不知履之所以為履在人本至卑而至下也故上下無辨則紀綱不立凌逼不慎則僭亂易生于焉因天澤自然之分制為典禮三千三百各有隆殺不相逾越為之君臣使天下貴役賤為之等級使天下尊役卑為之節制使天下上役下舉紛然不可齊之衆一

歸于截然不可亂之禮上者如天之不可以為澤  
下者如澤之不可以干天民見其上下懸絕若此  
則心志一定凡服飾器用之間進退升降際之際  
各守其分惴惴焉行無越思如農之有畔曾不敢  
一蹈其足於彝倫綱紀之外蓋自有天澤以來未  
之改也記曰禮禁亂之所由生者此也噫是禮也  
君子所素履者也惟此志默順乎天則德愈盛禮  
愈恭而率履不越惟民之所視履者即此在矣可  
不慎歟

天地交泰后以財成天地之道輔相天地之宜以左右民

天地交泰天本上而其氣下降地本下而其氣上騰二氣交則陰陽和而萬物暢茂所以為泰也后法泰之象以財成天地之道輔相天地之宜以左右民不其君民之交泰乎蓋天地之形不可交交以氣也上下之分不可交交以道也財成輔相豈強作於其間哉天地生萬民各有彝倫之等也后則教之攸叙以正其德天地生百物各有種植之時也后則教之允殖以厚其生天地生五材各有器用之資也后則教之制度以利其用若此之類無非因天地自然之道順天地自然之宜予以財



而成之使天秩地產成錯綜有道輔而相之使天  
時地秩各引導合宜以左右乎民耳陽為左陰為  
右左之右之使純乎中而無一之不遂也如此則  
盡人性盡物性以參贊天地之化育而后之所以  
交乎民者有道矣天下不其通泰矣乎雖然天施  
之地生之非后不成三才並立之道也况天地固  
有自然之泰而造君子退小人財成輔相所以致  
斯民之常泰者非后而誰

泰獨曰后可見開時運之泰非有時位者不能也  
天地不交否君子以儉德辟難不可榮以祿

天地不交否天氣不降地氣不騰則天地不交有  
否之象矣然天地閉塞賢人隱括囊無咎無譽此  
其時也君子觀否之象以儉德辟難不可榮以祿  
夫人君既任小人以至否則天下無邦君子雖有  
休否之志已無所施矣縱使小人為能包承亦不  
過榮之以祿焉耳而君子其肯為爵祿以自否其  
道哉惟知德之彰者人之忌吾惟儉約其德即以  
遠乎禍患之臨祿之及者禍之招吾已早見其幾  
孰能動其榮華之念非避患而忘世也地氣不上  
交已德不容以不儉而其不敢違者惟其時也非

辭祿而忘君也天氣不下降君祿莫可得而榮而其不可奪者常在我也是雖有挽回世道之心未嘗無明哲保身之智况超然于榮辱之外斯可以運其幹旋之樞處否之道固如此也君子柰且何哉

天與火同人君子以類族辨物

天與火同人天運上火炎上火與天同故為同人之象夫族之不一物之不齊欲強而一之齊之此必無之理也且如鑰鈔均謂之金玦瑜均謂之玉不別其異何以為同哉君子於同人得類族辨物

之道焉。天蕪覆而萬類自殊，火蕪照而萬象各別。天與火之大同則然也。于焉法天之量無所不覆，法火之明無所不照。如族有士農工商之殊從而類之，並處不相悖也。如物有鱗甲羽毛之別從而辨之，並育不相悖也。因其類焉以為類，因其辨焉以為辨，一皆在其大明之中。族與族相安，物與物相得，莫不歸於有容之內。如此則天下各得其所，雖曰我無所與實有以通乎天下之志也。此所以同志也。此所以同人于野亦庶乎天之無私覆火之無私照而天下其大同矣。否則于邾之同且不

克於私也況于宗於門者哉

同一人也父族母族妻族九族各類六德六行六藝三物有辨而明物察倫同之為人非大明其孰能之

火在天上大有君子以道惡揚善順天休命

火在天上大有天上之火日也日君象也日上于天萬物畢照故為大有之象所有既大而不有以治之則善惡兼容淑慝混淆恐水有獮獺而池魚勞國有好佞而良民消者不終無也君子于是遏惡揚善順天休命然惡必遏之而後天下知所懲

善必揚之而後天下知所勸非內剛外明不能也  
故法離兼照之明法乾獨斷之決見惡必遺與衆  
棄之見善必揚與衆榮之且惡日去善日升則惡  
亦反而進於善者此其幾也豈作好惡于其間哉  
天討有罪吾過之以天天命有德吾揚之以于所  
以順天休命而我無與也要之有善無惡者天命  
之性本人人所同有而過惡揚善不獨用人為然  
也反諸身以為善去惡非至明以察其幾非至健  
以致其決欲大有天下之善也難矣有志順天休  
命者宜省之

地中有山謙君子以裒多益寡稱物平施

十一

地中有山謙地本下山本高以山之高而在地之中高而能下謙之象也君子有見於高者降而下卑者升而上一升一降卑高適得其平於是裒多益寡稱物以平施焉何也常情視已常大高視人常不足此所以不得其平也君子自一身以達之天下見物有多者從而裒之猶艮下于坤而高固有以就夫卑也物有寡者從而益之猶坤上夫艮而卑固得以益夫高也或裒或益稱量以施之而適得其均平矣可見君子之心雖曰無衆寡無小

大無敢慢而分有崇卑禮有隆殺不得不與時以  
推移則是裒益在我所以稱乎物而平其施猶權  
之隨物低昂而我無與也信乎謙非一于卑已尊  
人過於詘屈之謂也要在人我得其平耳故以之  
處己而卑以自牧則德性純而氣質變以之處人  
而處以下人則和順積而暴慢消彘傳所謂尊而  
光卑而不可踰者其庶幾乎

雷出地奮豫先王以作樂崇德殷薦之上帝以配祖  
考

雷出地奮豫雷本純陽之氣也惟其伏之地中者



極其蘊蓄之久故出之地中者極其奮發之和豫  
之象也內順而外動聲震而氣和所以天地訢合  
萬物姬育而自然之樂在茲矣先王于豫之象得  
樂之道焉知樂由陽來而作樂以崇其德予以動  
盪血脉流通精神而中和之德胥此以養之也是  
無聲之樂既蘊之為和順積中之盛故有聲之樂  
正以洽其神人和暢之情故殷薦之上帝以配祖  
考而天神格人鬼享也何也氣和則聲和則上帝  
祖考莫不悅豫幽明浹洽大和之氣盈滿兩間而  
德于是乎崇矣可見雷本天地之元陽聲即天地

之元聲也雷一聲而群陰頓除萬類暢達故象其  
聲以為樂之所由作象其和以為德之所由崇此  
所以得聲氣之元而大和滿天地間矣後世精律  
呂者候氣于一陽來復之時其亦有所自云若區  
區於律管之較量而不知崇德為何事又何恠乎  
古樂之不作也

周郊上帝以后稷配大師樂奏園鍾于園丘園鍾  
乃二月律也周以前郊祀皆同仲春故曰先王可  
見象皆實事

澤中有雷隨君子以嚮晦入宴息

澤中有雷隨雷本動而澤至靜以雷而入于澤隨  
其地而靜也震本陽而兌則陰以震而下于兌陽  
氣隨其時而欽也况兌正秋也時之所至雷亦不  
得不深契于澤隨之象也觀月令仲秋雷始收聲  
可見矣是故君子觀象澤雷以懲晦入宴息夫晦  
明晝夜天之時也出作入息人之所以隨其晦時  
也當其收聲雖雷亦入息于澤之中矣人豈能一  
於動作而不息哉息也者生生之機孟子謂日夜  
之所息每日大陽入息于亥子之間每月大陰入  
息于晦朔之際每歲冬至之候乃天地一大息也

故收斂不固則發生之不榮靜翕不深則動聞之不達君子有見于此震陽魂也兌陰魄也故凝神聞寂淵默雷聲豈徒四肢之于安逸勞爾形毋搖爾精之謂哉必使神與氣交魂隨魄欲退藏宥密形神混合而寐亦覺也所謂尺蠖之屈以求信龍蛇之蟄以存神雖一宴息有不能外者其在語默因革仕止久速又可知矣或曰周公夜以繼日孔子終夜不寢此乃聖人以人競辰然歟是又不知宴息者非一於沉昏夢寐之謂也人對出而言息對作而言也乾九三終日乾乾夕惕若厲係辭通

乎晝夜之道而知然則知也揚也果以宴息而有  
問乎

山下有風蠱君子以振民育德

山下有風蠱振萬物者風也育萬物者山也以陰  
陽之氣宣暢而旁達也風而止于山之下是陽遏  
夫陰其氣鬱而不通則水多滯淫而蠱生哉此蠱  
之象也小雅云習習谷風維山崔嵬無草不死無  
木不萎觀此而蠱之義明矣邵子曰蟲者風之族  
故風字從虫是山風蠱亦是實象然豈終于蠱哉  
振其鬱而通之者風也育其枯而榮之者山也要

在練通山木而風氣之不鬱耳此則飭盞之道也  
君子觀象山風以振民育德蓋世之亂未有不由  
風俗之壞者君子以一身係高山之仰而民咸視  
之以風動焉所以盞之成也既由於巽而止而翻  
然更新之責舍我其誰哉知溺于宴僻狃于偷安  
民俗之盞也則勞其身以振之而鼓舞作興務有  
以獎勤而警惰知習于澆漓趨于刻薄民德之盞  
也則正其身以育之而薰陶涵養務欲其返朴而  
還淳如此而盞不可治民德不更新者未之有也  
要之法巽風以振民者起弊之急務法艮山以育

德者維新之真機而育已之德以振作其民尤君子重巽敦艮之大本也

澤上有地臨君子以教思無窮容保民無量

澤上有地臨地臨于澤上臨下之象也澤之漸入於地者淵泉不涸故其巖澤為不竭地之周于澤外者消流不洩故其容受為無方臨之義也君子觀象于臨知臨之道莫有大於教思容保之道也是故法澤之淫液者以教乎民則竭吾心思而浸潤之必久漸漬之必深一如澤之潤地而無窮也法地之厚載者以保乎民則大其容受而莫安之

不遺愛養之必周一如坤之容澤而無疆也如此則其臨也非臨之以勢位法制也因民之德而正之因民之生而厚之則民之永賴保釐而道其教誨者不待言矣雖然不徒曰教思而且曰無窮不徒曰容保而且曰無疆居民上者可以深長思矣噫足以有臨者在君子也非至無息而欲其無窮無疆也哉

風行地上觀先王以省方觀民設教

風行地上觀地之周徧萬方也本溥博而無疆風之旋轉地上也亦徧觸而不墮觀之象也先王于



風地得省方觀民設教之道焉何也百里之地不  
同風而移風易俗因民設教則存乎君也故欲以  
觀民而四方之不省何以得其好尚習俗之異欲  
以省教方而風教之不善何以起其大觀在上之  
享于焉時其巡狩柴望秩於山川諸侯朝于方岳  
修五禮如五冕命市納價命大師陳詩以觀民風  
或奢而示之儉或儉而示之禮無非因其俗設其  
教使之歸于中焉而已矣稽之古人春省耕而補  
足秋省斂而助不給省之各以其時南方風氣柔  
弱北方風氣剛勁教之各以其法皆觀民之類也

如此則溥天莫非王土率土莫非王臣而省方觀  
民故如風之無地而不行一道德同風俗而因民  
設教且如風之隨地而動物先王觀風之道固如  
此夫省方象坤地觀民設教象巽風而知風之自  
則省方莫要于省躬故九五曰觀我生觀民也此  
所以為觀之本歟

雷電噬嗑先王以明罰勅法

雷電噬嗑雷耀于上雷振于下聲光振撼閃爍若  
有吞噬之狀即象傳剛柔分動而明雷電合而章  
噬嗑之象也先王象雷以用威而威無不決象電

以用明而明無不察雖利于用獄而何敢濫刑哉  
惟此以明罰教法而已矣夫罰以懲過而有不明  
焉則過聽深文者何有於原情法貴畫一而有不  
教焉則巧詆緣飾者咸得以舞智是故明其罰而  
辨別鞠審之必精用之一時者固不得其情也教  
其法而比擬斷決之惟謹定之平時者莫敢撓其  
議也如此則法電以用明而明不失之過察法雷  
以申教而威不失之大苛矣考之虞書金作贖刑  
與象以典刑而並用宥過無大與刑故無小而兼  
行皆此道也否則過誤以從輕而狡偽且得以責法矣

山下有火賁君子以明庶政無敢折獄

山下有火賁山在上火在下火雖至明為山所止  
明而所有止焉自其明之所及雖庶物之小者兼  
照之無遺自其明有所止則雖欲剖決其大者而  
有不能也是故觀山火之象以明庶政無敢折獄  
也何也事莫繁於庶政如謹權審量讀法平價條  
貫簿書之冗雜出納禁令之詳密有志者皆可明  
也至於獄情之重幽隱萬狀單詞先入而造難分  
欲一成而不變一決而不留雖至明者亦止而未  
易折也于焉法離之明以明庶政非詳于小也明

之所能及雖至繁不能淆也法良之止而無敢折  
獄非遺乎大也明不及則疑生雖欲折之而有不  
敢也即此不敢之心固由於明而實止於明也亦  
有庶政可以文為獄情不敢文飾之意卦辭所謂  
賁亨小利有攸往亦可互發明矣

賁本與噬嗑相反以雜與震艮合體故義不同也  
何也動而明則無所不照故能創法于上明而止  
則不能及遠故惟守法于下觀象玩辭其義躍然  
山附於地剝上以厚下安宅

山附於地剝山本上地本下山之所以不虧崩者

以下址之博厚也下而地焉則高山擢而下附於地矣此剝之象也為人上者懼其剝也則當厚下以安宅蓋載山者地也地削則山崩矣剝山亦地也君者民也民判則君危矣剝君亦民也君猶山也民猶地也山欲永固其崇高則當博厚其地勢可免傾陷之患君欲永保其崇貴則當敦厚乎民生可免危忘之憂况地勢廣厚而鞏固不可拔乃山之所以自奠其基民德歸厚而固結不忍離乃君之所以自安其宅觀於剝而君上可自省矣所謂人情莫不欲壽三玉生之而不傷人情莫不欲

富三王厚之而不困人情莫不欲安三王扶之而  
不危人情莫不欲逸三王節其力而不盡皆厚下  
之道也至於卦言下剝上象言厚上厚下若不同  
也然卦論得病之原象發對病之藥在各象或從  
治或反治之不齊均之愈病者易道之也至於君  
子之受剝實由小人之為剝故謂之剝虛而君之  
剝喪乎元良之自剝其良心謂之居安宅也可乎  
哉

雷在地中復先王以至日閉關商旅不行后不省方  
雷在地中復雷本陽地本陰陽始萌於陰之下即

雷始反乎地之中復之象也雖一陽逆氣復于九地之下者已為萬物之資始然涸陰凍冰凝結地上惟其收歛之固是以歲之發生者于此乎始也天地之復且然可以人而不法天乎是故先王至日閉關商旅不行后不省方正以順天道也夫復見天地之心而閉關息民以養微陽夫固參贊化育燮理陰陽之道即效法雷在地中之義也然人心之善端獨無復萌之時乎莊敬持養如月令齊戒掩身之教亦先王之遺意也但復乃一陽萌動之機邵子謂一陽初動處程子謂動見天地之心



觀雷在地中。蟄而不震。固宜靜正。以養其初動之陽耳。人惟常有一陽為主於內。所謂復以修身。復以自知。備是矣。柰何世有以養靜歸寂為至日。閉關之實學者。終以迷復大敗。而反君道焉。是果復之謂哉。大意與陽乾初九潛龍勿用。陽氣潛藏。同既曰先王又曰后者。后指時王言也。恐至日閉關之制。雖制自先王。而時王未必行矣。時王所行者。惟于至日不省方也。故並舉之。各象先王與后。茲可惟矣。

天下雷行。物與無妄。先王以茂對時育萬物。

天下雷行物與無妄雷行于天之下動于物之上  
雷以時動動以天也是故時驚蟄雷一震焉則時  
至氣化萬物莫不起蟄萌芽飛潛動植各正性命  
凡有血氣知覺者霹靂之下邪妄頓除真是物物  
與之以無妄也先王觀象法天以茂對天時養育  
萬物夫無妄即誠也中庸謂誠者天之道誠者物  
之終始是也惟至誠為盡性以盡人物之性而參  
贊化育亦惟茂對其發育之時隨物物所自有者  
養而育之與之以厚生之道而勿失其時與之以  
育德之方而各當其可要以全其自然之性耳豈

能一毫增損于其間哉即承傳所謂大亨以正  
天之命也雖然吾人欲妄復無妄者即此可反  
求矣何也試即雷霆震鷲時驗之：然震動依  
俱罔念頃消真心呈露此即物與無妄而天命之  
性于此可見是無妄也無物不有無時不然而果  
能保此真心時：可以對越震雷而不雜以一念  
之邪焉則至誠動物而茂對時育萬物之道在我  
矣

天在山中大畜君子以多識前言往行以畜其德

天在山中大畜天者氣而已地之上虛空皆氣也

皆氣昏天也山特氣聚成形而為物之大者天在山中以形畜氣則天雖至大無外惟山之大為能畜之故山之中草木禽獸寶藏之所聚一皆氣所畜聚而成焉况山勢遠迤磅礴而天若畫于山之四周此大畜之象也君子觀象以多識前言往行以畜其德夫山本天中之物惟形與氣合故成大畜彼前言往行孰非先得吾心所同然者乎吾心之德天德也德性所固有者雖不因外以為之增益而大虛之量實無所不包特拘學淺見自小之耳欲尚友千古以大其畜則古先聖賢之言行皆

德也其德音德行皆可考而知也于焉本吾德性  
之良以廣其問學之益凡嘉言善行足為畜德之  
助者不徒識之而且多識焉非以誇多而開靡也  
要以畜吾之德而薰收並蓄以盡其蘊然識心通  
以透其微也如此則由博而約識與見聞而俱長  
見聞與識而俱融道吾之問學正以尊吾之德性  
既剛健篤實輝光而日新又多識前言往行而大  
畜則其天德之蘊畜何可量哉若析存心致知而  
二之不失之徒博則失之徑約皆非多識畜德之  
道學以畜德為主腦則多識前言往行皆大畜之

真功故曰博學而詳說之將以反說約也否則多  
聞擇善多見而識祇為知之次也會而通之聖學  
不待辨矣

山下有雷頤君子以慎言語節飲食

山下有雷頤山艮止雷震動陰陽有所節宣故萬  
物悉賴之頤養然山以形雷以氣氣動形止如人  
之頤上止下動而氣從之故為頤之象雷潛山下  
亦有靜養之義君子觀象于頤以慎言語節飲食  
養頤養莫大乎養德養生言語從頤而出也不慎  
則妄出而招尤匪以養德通以喪其德矣飲食從

頤而入也不節則安入而致疾匪以養生適以傷  
其生矣言語飲食象乎震之動而慎節則有象乎  
艮之止况修詞立誠雖庸言之必謹也故守口如  
瓶常持乎白圭之戒既能以德且終食之不違也  
故心存知味何事乎膏粱之求庶乎慎則不至於  
傷煩節則不至于耽慾由是多言不為躁寡言不  
為默箴歎不為困傳食不為恭表惡可以飲食言  
語為日用之常而忽之哉

卦辭曰觀頤自求口實豈徒飲食為然哉仲虺之  
誥曰恐後世以台為口實可見言語亦口實之義

也古人指口為出納之官又謂口是何傷禍之門也然則觀頤在觀其所養而所養莫要於自養慎言語飲節食兩言真有以蔽頤養之道矣

澤減木大過君子以獨立不懼遊世無悶

澤減木大過澤水旱與木高澤水奔以滋養乎木今兌上巽下是水勢泛漲至于減沒其木此大過之象也然水雖淹沒乎木其在澤也可謂大過矣然木之根幹未嘗搖動則木雖減于澤而不仆于澤非其根本培植之大過者能如是哉君子觀澤減木之象乃有大過人者在焉何也獨立不懼我



新者必多懼避世而莫我知者必多問人之常情也君子進則展其大過人之才而獨立不惧屹然頽波之中大行不為加也退則礪其大過人之節而避世無間怡然烟水之濱窮居不為損也斯人也定見定守雖一家非之一國非之天下非之而皆莫之顧如木在手水之中也慎獨者自中立之不倚如水掩乎木之杪也肥遯者自順應而無情此非素有大汪養大設施者必不能也嗟夫陽剛誠大過矣下巽上說初無一毫勉強之情此豈用智運奇者之為哉

水洊至。子坎君子以常德行習教事。

水洊主習坎坎六爻二陽陷于四陰之中四陰坎也二陽坎中一水也上下二卦皆坎下之坎水已至矣上之坎水冉至焉即其水之相仍洊至是為而坎重習之象目水之流行無間既見其有常自水之盈科而進又見其重習此坎中之所以常流而水不終陷於坎也君子觀象于坎諸本諸身而德行不常非洊至之上也淵源于德性洋溢于既行造次必于是顛沛是而險夷一致混混乎有常而不變徵諸民而也首示習非習坎之水

也必浸潤于五教漸漬以成事耳目一于斯心志  
孰朽斯而一再而已壹時習之不窮夫水不  
已於流不特盈坎以放于平而其終必至於海也  
君子法坎以常習焉吾知以此修德則德必日新  
以此教民則民習丕變所謂學不厭教不倦即此  
常習之義也卦辭謂習坎有孚維心亨行有尚與  
此大象並觀而出坎之道寧有餘蘊乎

明兩作離大人以繼明照于四方

明兩作離離明日也日一而已明兩作者即上下  
兩卦相繼之謂旦旦明作相繼而明故為重離之

象與水洊至習坎之義同大人觀離之象以繼明  
照于四方夫南面而治大人居嚮維之位也一日  
二日萬幾大人有照臨之責也明明德于天下非  
大人之學乎終日乾乾學以緝熙于光明既以全  
其常明之天日新又新光被於四表于以普其文  
明之化是明而繼續之不已則己之明德為己明  
矣繼明以照于四方則明民亦無不新矣大明終  
始而大人止至善之學不盡于離之象乎嗟夫虛  
明之體本人人所同然然則照亦明德之本然  
自人之一生言之即孩提之知愛知敬者是也自

火之一日言之即平旦無作好作惡者是也特患不能繼續之耳繼之云者豈能于明照有所增益哉即平旦清明之候作而起焉以復吾孩提愛敬之良旦旦接續一昏覺本之以時習由之以日濟則炯然虛明之中自能兼照萬類即所謂大人不失赤子之心即所謂大人正己而物正也世之人不以大人待其身自斷其明自小其照行不著習不察終身由之而不知無足怪矣彼流而為然照返照者盍仰而觀之日乎

山上有澤咸君子以虛受人

山上有澤成山本聳而上澤本潤而下以澤而容  
于山惟其山之虛也以山而受夫澤適以潤其燥  
也是澤能潤土而山受澤潤二氣相為感通惟其  
虛受故耳君子觀象山澤以虛受人蓋人心之虛  
苟不特於有我之私則於人无所不受其至虛之  
量本如是也故君子謙以受益虛以下人即其自  
視欽然惟知好問好察固敢自用自尊休休乎有  
若無實若虛視天下之知皆其知視天下之能皆  
其能直欲以一心容納天下之善而其中之虛受  
者猶不自足也何也善無窮心之空受亦無窮耳

否則高山自負以下澤視人人已不相貫通既不  
足以待天下之感惡足以未天下之善無窮之善  
哉可見山虛故能受澤自然二氣之相通心虛則  
能受人自然一理之相感象以成爲無心之感象  
以虛爲無心之感爻于四不言心而言貞其義一  
也否則咸拇咸腓咸股咸脢咸輔皆滯於一而不  
虛耳噫易謂虛受世儒遂緣以証虛寂之學焉果  
易之旨歟

雷風恒君子以立不易方

雷風恒震雷動而在外巽風入而在內雜卦傳曰

震起也巽伏也彖曰剛上而柔下陽震動而起則  
宜上陰巽入而伏則宜下二物各居其方而不易  
故為恒之象君子觀象雷風以立不易方彼陰陽  
剛柔各一其時尊卑上下各一其等子臣弟友各  
一其倫視聽言動各一其用自此以推之惟其方  
以類聚是以辨方正位而立之不易乃其一定之  
理也豈執一而不通哉天下之人極自我植立則  
大中至正之矩雖欲易之有不可得者如上下固  
所以相成而在上位不陵下在下位不援上截然  
不敢以混淆言動固所以相須而言有餘則當謹



行不足則當勉然不容以紊亂所以知有定見  
既辨夫似是之非守有定力又不奪於外物之誘  
即其所以特立于己者夫固統同之中有辨異者  
在變通之內有決定者存蓋亦隨其方之所在而  
立之此其所以有恒德也即豕傳所謂久于其道  
是也

天下有山遊君子以遠小人不惡而嚴

天下有山遊天氣雖下降也其體本高山勢雖上  
降也其體終下然高山之巔即天也及登山之巔  
以觀天又若遠而去之而遊乎其不可及是天上

進而山下止避之象也非天有心以遠山也山之峻極若有及天之勢而天之高明若有遠違之機即二陰浸長于下而四陽避去之義也但天雖遠乎山實未嘗絕乎山而莫之覆幬君子觀象天山以遠小人不惡而巖何也君子德尊禮恭言避行正小人自不敢近也保養休否固不與之共事而早為之畜先見豫防亦不待其患至而後為避于以修吾本然之德彼固心服不敢媒孽以相加于以盡吾當然之禮彼亦敬承不至媚嫉以相陷待之未嘗不巖絕之不至已甚如此則不惡既以遠

其害惟嚴且以潔其身避之朝堂可以久則久也  
避之湖海可以速則速也待小人之道當如是也  
然則天下有山天之體本高愈避愈高而山自不  
能侵乎天耳君子之遠小人未嘗不然以峻絕之  
也其如小人自絕于君子何

雷在天上大壯君子以非禮弗履

雷在天上大壯雷震之威本自震迅自一陽來復  
而伏之亦久矣時雷仲春雷之發聲也既以其時  
雷在天上威之震擊也自極其烈此大壯之象者  
也君子觀象雷天以非禮弗履何也震而在于天

上則隨其所履而陰邪蓋開根蟄悉啓一毫非禮  
之不存矣君子非禮弗履非陽剛極其壯盛也為  
能然乎是故元陽之在吾人也至大至剛塞天地  
伸萬物其大壯本如是也惟君子則純任乎禮義  
之正而不逞乎血氣之剛凡視聽言動之間自決  
去乎非僻之累蓋由一日用力而力無不足亦惟  
法天以自強法雷以自奮而已矣所以真念一動  
百邪退聽殆如雷霆一震魍魎潛消要皆我之所  
自有亦我之所自能者所謂克己復禮而動以天  
者在茲也非天下至勇其孰能之

明出地上晉君子以自昭明德

明出上晉日為衆陽之宗本無不明而明未出地則地猶得以掩之也或曰己至于中天明則矣日中則昃亦不足以形容其晉明之機惟日出地上其明固自明也而明之進進不已者于此乎始所以為晉之象象曰晉進也詩云如日之升是也全重在出字上出即晉字意君子觀象於晉以自昭明德夫明德在人其虛靈不昧之體本不慮而知而為人人所同有者特蔽于物欲不能超出萬物之表而有不明焉者人自昧之耳昧之自我則昭

之自我人不得而與其力也惟奮然物欲之一克  
則炯然德性之自明日出地上日自明也其貞明  
上進之不已者初無一息之停明德本于性中吾  
自昭也其明覺日進之無疆者亦無一刻之間况  
未昭之先孰為之教而至虛至靈者未嘗息既昭  
之後孰為之明而常明常覺者實無窮此致知之  
學所以在人自悟而自得也大學所引康誥曰克  
明德大甲曰顧諟天之明命帝典曰克明峻德皆  
自明也繼以湯之盤銘曰苟日新日日新又日新  
合而觀之斯可以盡吾明之意

在天曰明命在人曰明德是心體本明也學者豈  
能於本體之明加毫末哉觀晉象曰自昭大學曰  
自明工夫即本體也其如人之甘心昏不能自  
昭自明何哉所以行不著習不察日用而不知也  
故聖人即人心本明之德示以自昭自明之學惟  
學之始也果有昭明之功則學之至也即為通明  
之聖矣

明入地中明夷君子以蒞衆用晦而明

明入地中明夷至明者日也至晦者地也日入于  
地雖其本明者未嘗損而昏明于地之上者則亦

晦于地之中此明夷之象也君子觀象明夷以蒞  
衆用晦而明夫明之與晦雖若相反而顯仁藏用  
其機實相須也何也天下如彼其衆也吾如用其  
明以察之則一人之智安足以防億兆之奸欺而  
其明反傷矣况察及淵魚為不祥豈蒞衆之道哉  
惟用晦而明焉則沈幾先物深藏若虛欲精明于  
渾厚之中崇真實於明作之外觀乎其用雖若一  
若所知而韜光內照燭然神明之淵含矣豈有  
心以晦其明而和光同塵哉洗心以退歲于密人  
莫不能窺其際也所以不違不德抑亦先覺不識



不知帝則然順惟無知而無不知其體如固是也  
君子用晦而明特因明入地中之象而有所悟焉  
耳噫惟其有虞淵之晦是以有暘谷之明邵子謂  
日入地中構精之象也用晦之學可易言哉

風自火出家人君子以言有物而行有恒

風自火出家人巽為風離為火火之炎氣上衝即  
風之飄揚鼓動是火者風之母熱極風生即其義  
也巽風在外離火在內君子知風之自而風之出  
自火焉則知天下之風化自家而出一家之風化  
自身出故言行者一身日用之不可離亦家人所

則效而薰陶漸染不容強歸者也庸言之謹而或  
失之有餘則不誠而無物矣故有餘不可盡而所  
言必真實有物之言也庸德之行而或失之不足  
則不恒為可羞也故不足不敢不勉而所行必恒  
久不已之行也如此而正言行以修其身則父子  
兄弟為足法矣夫固不令而行不言而喻風動其  
家者皆自明德中出真如火氣薰蒸一家從風而  
丕變矣所以上九亦曰咸如之吉反身之謂也以  
此反而觀之果知一身之言行乃一家之風化所  
出而一言一行其可以家庭日用之常而乘之以

怠忽之心

上火下澤睽君子以同而異

上火下澤睽火本炎上而處於兌澤之上澤本潤下而處於離火之下二陰同体其性異趨此所以睽也君子觀象於睽以同而異何也食色與人同也而與縱欲者異好惡與人同也而與徇情者異語默與人同也而與飭人者異取予與人同也而與沽名者異如同一臺池也文王與梁惠異同一獵較也孔子與魯人異欽明啓明其明不既同乎而克與丹朱異矣溫恭象恭其恭不既同乎而舜

與共工異矣所謂堯舜與人同而堯舜與人異也  
可見其同也非徇俗而尚同其異也非絕俗以立  
異君子和而不流群而不黨周而不比固如是也  
正猶兌離本同乎卦之陰而火澤自異乎卦之象  
耳若曰秉彞同性制行異宜非象旨矣噫道同迹  
異不害其為同道異迹同不容以不異所以孟子  
曰君子之所以異于人者以其存心也信乎君子  
與人同此心也而存心異之耳其他形迹又  
山上有水蹇君子以反身修德

山上有水蹇水遇險則行之甚艱山遂上又止乎

其險坎陷于上艮止於下是山之上有水矣上下  
險阻而窒塞而不達艱險而不通所以為蹇之象  
也君子觀象於蹇以反身脩德夫水之流也阻于  
山而不出乎險必盈乎險而後可以出乎山君子  
之於蹇也反求諸身以增脩其德然後蹇可通焉  
如愛人不親反其仁治人不治反其智禮人不答  
反其敬行有不得皆反求諸己殆隨其困窮拂鬱  
之遺顛沛流離之際莫非堅志熟仁之地此處蹇  
之道也况身一正則天下皆歸德一條則命可永  
配天人皆順何蹇之有非無蹇也蹇之由於天人

者雖不可必而反身脩德之取決于我者實可自強如此則動心息性增益其所不能皆蹇之力也且吾備吾德則此身隨遇皆安又見險而能止濟險之有道殆如水之行險而順無入不自得矣良其背無咎習坎惟心亨反身脩德其黨體而不累乎雷雨作解君子以赦過宥罪

雷雨作解坎在上為雲故為雲雷屯在下為雨故為雷雨解震動滂沛雷雨交作而天地鬱蒸之氣渙然其解散矣何也動萬物者莫疾乎雷潤萬物者莫潤乎雨雷雨作於上則萬物之生意莫不發

舒暢達為之一新此解之象也君子觀象雷雨以  
赦過宥罪夫民有過從而赦之以其誤也民有罪  
止於宥之以其故也雷震乎上雨潤乎下故刑獄  
中之一赦一宥若有不齊孰非君子與民更新之  
意乎如此則回枯起稿天地大生之仁固以解而  
普及於萬物起死回生君子生生之仁亦以解而  
推廣於萬民要皆自其一念生機勃乎不容已者  
發之也噫哉培傾覆雷雨不過因物以付物赦過  
宥罪君子不過以人而治人雖雷雨不能生子已  
朽之物君子其能盡赦有罪之民哉一體之中自

自有等殺莫非天也

山下有澤損君子以懲忿窒慾

山下有澤損山高澤深以山而逼近乎澤則澤寇  
山而山日削是山之損也山壅澤而澤日涸是澤  
之損也山下有澤損之象也君子觀象於損以懲  
忿窒慾夫怒氣屬陽一或激而發之其突然莫能  
遏者如山之高而暴戾固足以陵人慾情屬陰一  
或隘而洩之其淵然無底止者如澤之深而浸淫  
適足以溺已人所當損者莫大是也必於忿則懲  
之發於前戒於後而厲氣為之盡消于慾則窒之



防其流止其源而情實為之永塞蓋忘怒觀理寡  
欲養心君子之學當如是也雖然人生而靜天之  
性也何忿何欲也感於物而動斯忿與欲皆足以  
累吾性矣君子為能涵養乎未發之本原故發皆  
中節而一或發有不當則損之又損以至於無亦  
皆因其所未無者以致其克治之功而吾心可以  
復其固有之天矣

風雷益君子以見善則遷有過則改

風雷益陰陽之氣愆而為風震而為雷雷迅則風  
烈風暴則雷疾二者本相須也况風怒于上又得

雷以助之若愈張其鼓盪之勢雷怒于下又得風以助之若愈激其根迅之威此益之象也君子觀益象以遠善改過彼風之所盪而陽氣為之舒暢則知之為可遠矣雷之所震而陰氣為之盡陰則知過之為當改矣君子見人有善其遠之如不及者如風之吹入於其懷雖益之自外而不至於蕩善悉備不已也覺已有過則改之惟恐不速者如雷之震動於厥躬雖益之自內而不至於纖惡悉除不已也况風與雷交相益也敏於遠善則過益寡速於改過則善益純所謂日進無疆其益無方

者在茲矣欲求有益於得者可無雷厲風行之勇  
哉要之遠改雖若二之實則一也顏子有不善未  
嘗不知知之未嘗復行所以得一善拳服膺而  
勿失也何也克己復禮無二功也二其功者何有  
於風雷相助之益

澤上於天矣君子以施祿及下居德則忌

澤上於天矣澤性潤下天體至高以澤而上於天  
其潤下也決矣雲與雨施澤決及物故為決之象  
君子觀象於決以施祿及下居德則忌夫祿也者  
所賴養賢以及民而潤澤天下者也澤而上於天

則勢必決於下天之共也祿而有於己施必及於人君子之共也雖祿以養賢未嘗不論其功而天祿與共必不私其所有此固其所當決者若以之居德則忌矣何也德雖我之所自得而其進無窮不積則不充不凝則不固也苟得之於中即潰決於外有其善誇其善有其能矜其能雖得之必失之矣居德而共也寧非其所忌哉可見共一也以之施祿則宜不可渝於出納之吝以之居德則忌不可存乎驗驕吝之私蓋利祿當公溥于人德義當固守於己君子所以善用共也

或曰禘之施也當與即以此自居其德則忌但下  
句於與字之義不甚親切當與否卦大象一例看  
天下有風始后以施命誥四方

天下有風始天至高也物之處於下者莫不賴其  
覆憐之恩而欲與天遇也難矣然挽萬物者莫疾  
乎風風氣一揚萬籟從之則天雖不與物遇而其  
所以遇之者存乎風也故為始之象君后觀象於  
始以施命誥四方夫以后而視民尊居九重遠在  
萬里巍乎其一天之高也何能以相遇哉惟大哉  
王言重巽申命或如和風以善其煦育之仁或如

寒風以鼓其肅殺之義命誥一布四方莫不鼓動  
而隨風以鼓拂矣是風乃天之號令也天以風而  
誥萬物凡被其吹噓者莫不鼓舞于先天之下命  
乃后之風聲也后施命以風萬民凡若於訓誥者  
莫不風動於文命之中君之遇民係於命誥有如  
此以上有好者不必有甚焉故也否則其所令反  
其所好而民不從矣故曰撫我則后虐我則仇有  
風教之責者其慎厥好哉

澤上於地萃君子以除戎器戒不虞

澤上於地萃澤本屬下為衆水所歸水聚盈滿則

上之於地浩，乎萬派平容而為天下之巨浸此  
萃之象也夫天下至平者水也至易潰決者亦水  
也澤上於地則不事堤岸壅塞而自無泛濫潰決  
之虞此乃澤地自然之萃即中庸謂地之博厚振  
河海而不洩是也君子觀象澤地以除戎器戒不  
虞蓋民之不聚由禍亂之不平則戎器之用固有  
不容已者若喪亂既平而民之爭心息矣則當歛  
戎器而藏之與民休息而綏之以文德矣然亦治  
不忘亂安不忘危用戒不虞而先事有未然之防  
焉亦非若秦人鑄金銷兵而遂忘不虞之戒也法

坤藏以為除法兌口以致戒古人常聚不爭率用  
此道也若云修而聚之之謂除固與字義不協書  
武候篇謂偃武修文放牛歸馬示天下弗用詩周  
頌時邁篇謂載載於戈載橐弓矢我求懿德肆於  
時夏何謂也况止戈為武戎器固不容以不除而  
寓兵於農則儆戒自可以無虞也易示羣民之道  
斯其至矣否則欲假堤防以聚水者固不以語天  
下之大澤欲假戎器以羣民者亦豈足以語民心  
之歸仁乎

地中有木升君子以順德積小以高大



地中有木升木之生也根植於地中由萌蘖而拱  
把由拱把而合把高可干霄大可蔽日其上進殆  
不可遏此升之象也君子觀象於地木之升以順  
德積小高大夫坤地木有順德之象巽木本有積  
小高大之象觀木之高大者由於萌蘖之積而地  
之生者其機為至順也吾人之德其仁義禮智之  
根於心也視被木之生機為本順者何異哉特不  
肯由小以積之耳果能下學上達自一念之小積  
而至於念念不忘自一事之小積而至於事事匪  
懈日積月累則吾心之達順者自然潛滋暗長有

生則惡可已之勢而高明廣大之極不過由漸積  
以馴致也但積雖以漸豈容矯強為之哉始而孩  
提之不學不慮終而聖人之不思不勉其順德之  
木體孩提無所減聖人無所增猶夫木之植根于  
地而高大以時升者不容以人力參也夫何異學  
頓悟頓修既不知積小之功未免捱而助之長也  
俗學珠積寸累又不悟順德之體銅花鏤葉強以  
人力勝天工而生機息矣又奚怪聖學之不明哉  
澤無水困君子以致命遂志

澤無水困兌積水也坎流水也澤積於上坎流於

下下流則上不能積而涸矣故為澤無水困之象  
君子觀象於澤水之困以致命遂志夫困阨之遇  
其所以莫之至而至者命也命之所在則見危授  
命凡殺身以成仁舍生以取義皆所不顧而必不  
肯僥倖以苟免然困而不失其所則中有所必為  
者志也志之所在從吾所好志仁必欲遂其不忍  
之真志義必欲遂其不為之念雖命之所在而此  
志則必不可奪也故體坎之險以致命休澤之說  
以遂志也豈二之哉命在天不可必也志在我可  
自盡也盡其在我以聽其在天則困雖委命於天

困而亨實遂其志於我矣况志而可遂則生不為  
律生死不為苟死坦坦然無愧無怍無入不自得  
也故曰志士不忘在溝壑噫真有志者立命在己  
夫何困之有

木上有水井君子以勞民勸相

木上有水井巽為木坎為水凡鑿井者既以及泉  
則以木橫其下而水上於木矣木下於水則其水  
不混水上於木則其水不竭此井之象也君子觀  
象於井得勞民勸相之道焉夫井本有水在人鑿  
之而已矣體坎險以勞之而不怨也井木至清在

人巽之以木而已矣體巽入以勸之得有相之道也君子知民之有性猶井之有水而始之以勞耒之方知民性至善猶水之性至清而繼之以勸相之術雖勞之勸之我惟盡其當然之職而自勞自勸民各全其固有之真況水之用汲也本利養之不窮我之勞民也亦誘掖之不倦如是則因井可以悟性勞民且以盡人之性斯民也既賴井以養其生又象井以養其性井之有益于人大矣信乎井為德之地也

澤有火革君子以治歷明時

澤中有火革革為變更虎變豹變亦取變義兌為澤離為火火在澤中如彭蠡雲夢火澤巨浸忽有大光非變而何故不待滄海漸成桑田江河忽生洲渚方為火氣蒸灼而後見其變革此所以為革之象也所謂澤有陽焰所謂陰火潛燃皆澤中有火之義君子觀象澤中之火知天下之當革者其義不一而莫大於治歷明時夫天本動體不可形狀即各經宿分十二次以為之體觀於日月五星之經次則知天度之漸差此所謂歲差也離屬夏兌屬秋即一歲之間夏革而為秋離變而為兌暨

度密移將來者進成功者退夫固順時變革之道也由此而知呼吸者一息之革也晝夜者一日之革也分至者一歲之革也歷元者無窮之革也故天運不齊而歷無定法惟候氣定朔則度數不差於以治歷而日月星辰各極其躔度之精於以明時而春夏秋冬各極其推步之密即澤火以觀四時即時序以候天度雖千歲之日至可坐而致要皆順天以變革未嘗強天以從曆也後世曆家一定其差法而不知革者視此當何如但四時以相生為革而雜兌不免於相尅雖曰維其尅之是以

生之而卦辭則曰革已日乃孚蓋以離中納有已  
土所以離兌為一歲中之革者由已土為之相生  
故也推治曆明時之義而已為戊己蓋信矣

堯典命羲和欽若昊天曆象日月星辰是日月星  
辰之躔次乃曆之所取以為象其變革日月隨乎  
日月星辰未嘗執乎一定之算也觀日短星昴以正  
仲冬是冬至昏見之星昴在天中則日之躔回在  
虛也子之虛非子之半乎可見堯時冬至日躔虛  
宿周冬至日躔牽牛漢大初曆猶在牽牛唐宋在  
斗元曆在箕至我朝則在箕三四度矣自子之半



虛之十度至箕三四度已差六十五六度日躔遲  
速不可同自古迄今未有不變筆者治曆明時取  
諸筆也何疑哉

木上有火鼎君子以正位凝命

木上有火鼎木以火為用火以木為體木上有火  
斯可以成烹飪之功此鼎之象也夫木火併則鼎  
有定位而鼎則以水火為命也况鼎非虛器也其  
中必有實所以享上帝恭聖賢者在茲焉非端正  
凝重則木火亦無所用矣君子觀象於鼎以正位  
凝命何也君子之所居者天之位也所承者天之

命也命不於常斯位不易保革命固所以易位正  
位乃所以凝命也况鼎之器正故木火之用為不  
虛君子之位正斯天命之凝為愈固惟中心無為  
以守至正而夙夜基命宥密斯凝之有道矣且鼎  
亦非假設是象以明是卦也鼎乃重器本聖人之  
所寶者受天命而位南面所以為主天下之重器  
也自禹鑄鼎象物其後遷鼎於商至武王克商遷  
洛邑及楚子問鼎於周王孫滿對曰周德未衰天  
命未改鼎之輕重未可問也在德不在鼎即正位  
凝命之意可見正位凝命之得象於鼎者一皆實

事由此推之六十四卦其所取象惡可以為無確  
定之義哉

游雷震君子以恐懼修省

游雷震天威至疾而可惧者莫如雷；聲一震威  
已迅矣况重槩而游至乎上下兩震故為游雷震  
之象君子觀象於震以恐懼修省夫戒慎不覩恐  
惧不聞無時不修省者君子之學也豈待雷聲而  
後敬畏哉常人之情聞雷鮮不知惧而既震之後  
未必能修省也君子之心其時；畏雷之心乎朝  
乾夕惕而終身兢業之不忘反己自修而時刻內

省之不疚非以避禍也存心事天之功當如是耳  
詩云敬天之怒無敢戲豫敬天之渝無敢馳驅又云  
畏天之威於時保之此其小心翼昭事對越者在平  
時亦凜然游雷之震也所以卦辭震雷虩笑言詘  
震驚百里不喪匕鬯孰非平時敬畏之功哉可見恐惧  
修省即震之象孔子迅雷風烈必變亦此意也噫善學  
者果有悟於雷焉則雷在地中不遠復雷出地奮以  
作樂崇德雷在天上以非禮弗復天下雷行以茂對時  
育物何往而非恐惧修省之學耶

蕪山艮君子以思不出其位

蕪山艮巍然鎮靜而不遷者莫如山也上下皆山則蕪山矣上者止於上而不侵乎下下者止于下而不踰夫上彼此定位屹然不動此艮之象也君子觀象於艮以思不出其位夫心之官則思木寐然不動感而遂通天下之故者也憧！往來朋從爾思則思出其位矣君子郭然大公物采順應事物之感各殊吾心之思則一思以盡其倫也君臣父子與國人交雖不齊而不越乎天然之則思以順其遇也富貴貧賤夷狄患難雖不一則各安其素位之常是未嘗不思也凝然洞然應感無滯則

思雖萬變而一貞夫理所謂知止而後有定是也  
與山之鎮靜各安其所者何異哉豈謂時止則止  
時行則行動靜不失其時正此謂也可見思不出  
位則雖有所思而我無所與凡所謂慎思近思思  
無邪儼若思皆是道也此所以思曰睿！作聖思  
為聖功之本噫人惟思不出位則無思無不通如  
鑑照妍媸而鑑不動衡稱底昂而衡常平凡着於  
有思而逐物往來者固非也彼釋氏禱反其心不  
可思議鄙儒即同之以良背之學也其亦不思之  
甚哉

山上有木漸君子以居賢德善俗

山上有木漸夫以木而托處於山之上孰不仰其  
高哉木非無自而高哉山本高矣木因高以植其  
根及其長也固喬然不可攀而其生也實漸次而  
不驟木既藉山以漸長山若因木而愈高是木以  
山為居山以木而美非一朝一夕之故矣此漸之  
象也君子觀象於漸以居賢德善俗夫德行乃斯  
民之師表惟居得其位固可以端風教善民俗也  
雖風俗未易以驟變然日與善人居則久而不覺  
其漸化矣齊宣王謂我欲中國而授孟子室養弟

子以萬鍾使諸大夫國人皆有所矜式是也果能  
真知有賢德者屈己以尊崇之凡居其位重其道  
者靡不至也庶乎我既隆之以師範而卓然風聲  
之一樹則民皆有所儀刑而煥然風俗之漸移况  
薰陶漸染不責效旦夕之近也則轉移化導始而  
變久而淳民俗日入於善而有不知誰之為之者  
矣久道成化必世後仁聖王且然書稱既歷三絕  
世變風移其斯之謂歟

澤上有雷歸妹君子以永終知敝

澤上有雷歸妹雷震於上則澤水皆隨而陽動陰



說女從乎男所以為歸妹之象也君子觀象歸妹  
以永終知敬夫婚姻乃人道之始而偕老為夫婦  
之終必男女以正婚姻以時斯可永終無敬也歸  
妹乃說以動者也况以少女從長男其動也說也  
皆不正也既以不正合之於始則其終之必有敬  
也即此可知矣書曰慎厥終惟其始所以言必慮  
其所終行必稽其所敬蓋為此也然則欲為永終  
之為必豫謹始之慮既知致敬之本必求起敬之  
方如此而可繼可久之道在我矣雖然貞女之從  
人士君子之出處其謹始一也夫何世之自媒自

驚者或裾王門奏記相府喪名失節恬不知悔始  
之救也極矣又何待於終而知之哉噫惟其知救  
而見機是以令終之有倣君子不妄動不妄說一  
以道為之準耳

雷靈皆至豐君子以折獄致刑

雷靈皆至豐震雷離靈雷至威也電至明也雷與  
皆電至則威耀極其盛大而萬類雖繁莫不在其  
震動照耀中此豐之象也君子觀象於豐以折獄  
致刑夫人命至重刑獄至大欲上不屈法下不寬  
民也難矣故必法電之明以折乎獄法雷之威以

致乎刑非故為此以震耀斯民也蓋刑獄本天之  
所以討有罪也威至而明不至則獄之折也雖決  
其辭而無以得其情何以折衷其至當之律明至  
而威不至則刑之致也雖按諸法而無以當其罪  
何以曲致其比擬之詳惟威明皆至則惟明克允  
惟斷乃成姦惡無所遁其情折致莫不中乎理猶  
之雷電並至而普天萬類孰敢恣其惡哉噫特極  
豐盛則人心玩而法漸弛折獄致刑威照並用君  
子處豐之道當如是

噬嗑豐二卦皆以離震成體雷電噬嗑明在上故

以明罰赦法歸之先王自立法者言也雷電皆至  
豐明在下故以折獄致刑歸之君子自用法者言  
也觀諸天象雷之擊必與電俱電之擊必與雷並  
明威兼用掌刑獄者其可偏哉

山上有火旅君子以明慎用刑而不留獄

山上有火旅火有時而在乎山之上則山以火而  
明山實不能久留夫火則火以山而止此旅之象  
也何也火之於山縱野燒延緣亦不能以久留也  
旅之於途次非久寓之所罪人於刑獄豈久霸之  
處哉君子觀象山火以明慎用刑而不留獄蓋刑

獄本不得已而設民有罪者不得不致之於獄而  
 久留淹滯則非刑期無刑哀矜勿喜之心也是故刑不  
 明則枉於是象離之明以用其照而可以無適情過明  
 則察於是象艮之止以致其慎而可以無濫刑過慎則  
 滯於是象火之山而不留夫獄焉如是則山者則火之  
 所旅而火不久留於山獄者罪人之所旅而罪人不淹  
 留於獄明慎之中仁恕存焉聖人之盡心於獄也至矣  
 賁山下有大明在內止在外故明庶政而無敢折  
 獄旅山上有火止在內明在外故明慎用刑而不  
 留獄折獄者獄未具而決之也留獄者獄已具而

留之不決也二卦皆離艮成體正可互觀然刑獄以離明為主而曰無敢曰不留其有取於艮止之意亦深矣

隨風巽君子以申命行事

隨風巽天下之巽順善入者莫過於風而風相繼隨風也既有風以先之又有風以隨之風相隨而不息何其巽而順也故為巽之象君子觀象於隨風以申命行事大凡政事未行之始必先有訓誥以諭之使民皆曉然知利可興害可除也於是重復申明其命如風之相襲而至既告戒之又丁寧

之然後見諸行事而行即行其所由命者焉即所謂巽以出之也然巽與之言能無說乎故以行乎與利之事藹然如和風之冲融以行乎除害之事肅然如寒風之凜烈則四方風動莫不順從其命矣君子巽入民心之道當如此可見風者天之命也惟隨風以鼓舞乎萬物適以廣其吹噓之仁命者君子之風教也惟申命以鼓動乎萬民而悉以見諸行事之實是無一物不從乎風亦無一民不從乎君子之命上下皆順巽之至也故曰君子之德風愷中命行事謂之巽慢命致期謂之暴為人

上者其慎辨之

聖主命令如觀設教蓋振民始施命小畜懿文德  
大抵皆取風能善入順從之意

麗澤兌君子以朋友講習

麗澤兌物之相說莫如潤澤之相資麗澤者雨澤  
相附麗也雨澤相麗交相浸灌而悅澤之意即于  
此乎存此兌之象也君子觀象麗澤以朋友講習  
益義聚樂惟朋友則然所以同氣相求同志相資  
自一鄉一國以友乎天下之善士豈徒情義相聯  
屬而已哉義理本足以說心也但一人之聰明有



限天下之義理無窮不得不講論而重習之焉既  
參之衆論而明辨之不已又一驗之身心而取益之  
無方切磋砥礪之間不有益於我必有益於彼况  
虛懷樂受相觀而摩彼此兩相益乎如此則二澤  
相巖固有互相浸潤之義而衆朋合聚自有互相  
沃洽之機人已交脩知行並進講習於一時一時  
之說也取友愈廣則潤澤之愈深而欲罷不能其  
中心喜悅殆不可以言語形容矣觀論語首揭時  
習之說朋來之樂聖人示人為學取友之意至矣

此

兌木無言之說也而朋友講習豈說以言哉蓋天下之說雖出於正而未免係乎情惟講習之說純乎理也剛中利貞又不待言矣

風行水上渙先王以亨於帝立廟

風行水上渙風之拂披靡定水之波瀾不常二物相觸皆散而不洽此渙之象也先王觀象於渙以亨帝立廟何也渙則當聚也天下聚渙之道莫有大於上帝之當享祖廟之當立者以天本至大神氣無所不在祖禰至幽魂氣無所不之郊廟之禮所以祀上帝也歟吾之精誠以對越在天則一念

潛乎於冲漠而天神聚矣宗廟之禮所以事乎其  
先也歟吾之精誠以駁奔走於廟則一念默契於  
幽冥而人鬼聚矣萬物本乎天人本乎祖享祀以  
格天立廟以格祖則仁孝誠敬之至無不貫通而  
六合聚於一人又何渙之足患哉噫幽明神人若  
不同而貫徹無間者以其精神本至一也惜一人  
之精神於天下則志難莫不解散聚天下之精神  
於一人則幽明莫不會歸識此斯可以語渙之道  
故中庸曰明乎郊祀之禮禘嘗之義治國其如視  
諸掌乎

澤止有水節君子以制數度議德行

澤上有水節川壅為澤乃衆流所匯坎之流於上者雖無窮澤之納於下者則有所止而不至泛溢此節之象也君子觀象於節以制數度議德行夫政事科條之無節者以數度之無制也而數度者又因數以為之度必使裁制之有法焉凡多寡劑量殊短長盈縮之別上下升降之異大小等殺之差固不制之極其密也由此禮達分定賤者不得以踰貴卑者不得以踰尊與服宮室咸有節制而不敢踰矣人才叙用之無節者以德行之不議也

而德行者又由德以見諸行必使擬議之各當焉  
 凡賢哲才能之等忠良俊乂之侍翼為明聽之分  
 憑翼孝德之叙固不議之極其詳也由此隨才器  
 使德之大者位乎上德之小者位乎下爵祿名位  
 咸有品節而不敢過矣如此則政事之因革人才  
 之黜陟莫不中其節也是豈有意以立其節乎天  
 然自有之中不可過不可不及者也君子特觀象  
 水澤而得夫持節之道耳且云如是則甘不如是  
 則苦無非使人同歸於中也不然苦節亦難矣豈  
 故為是言以純天下哉

澤上有風中孚君子以議獄緩死

澤上有風中孚風惟虛故能善入澤惟虛故能順  
從澤上有風乃以虛感虛所以為中孚之象君子  
觀象中孚以議獄緩死議取諸兌緩取諸巽也王  
制刑者例也例者成也一成而不變故君子盡心  
焉此心為非中孚其何以盡之哉正以獄訟之間  
情偽微暖其變千狀一或聽之不審則死者不可  
復生刑者不可復贖此心何能以自忍也故獄將  
決而議之務求其入中之出既決則寬緩之且求  
其死中之生所以王聽之司寇聽之三公聽之議

獄也旬而職聽二旬而職聽三月而上之緩死也  
 即其至誠惻怛之衷與其殺不辜寧失不經真如  
 風之動水而後有以盡其心耳如此則風動而隨  
 隨上巽而下說書曰刑期於無刑協於中又曰好  
 生之德洽於民心茲用不犯於有司其即此中孚  
 之謂歟雖然得情哀矜勿喜豈可以聲音笑貌為  
 哉卦象以豚魚彖象以虛舟爻象以鶴鳴子和必  
 如此而後謂之中孚利貞應乎天也是故議獄緩  
 死非有中孚之實德不能也君子雖反求諸身  
 卦象言刑獄者五噬嗑賁豐旅皆以離明為主故

震動則明教折至良止則無敢不留惟中孚則有  
取於兌巽先儒謂中孚全體似離亦是其實則終  
之以至誠惻怛為刑獄之本也

山上有雷小過君子以行過乎恭喪過乎哀用過乎儉  
山上有雷小過大凡雷雨交作去地甚遠震驚百  
里亦不甚遠故雷雖奮迅於高山絕嶺聲不甚烈  
止於一過焉耳蓋空中上無窮下有限聲本乎氣  
故上聞之小下聞則大也即飛鳥遺之音不宜上  
宜下之意詩云殷其雷在南山之陽山上之雷震  
於高處其聲殷：然而已此小過之象也君子之



小過果安在哉行過乎恭喪過乎哀用過乎儉是也夫恭也哀也儉也皆美德也以中通律之過恭恐無禮則勞過哀恐毀至滅性過儉恐鄙吝而至於陋則亦不免小過矣然而君子有時過之者何也時皆過乎薄君子寧過於厚故與其簡也寧過於恭與其易也寧過於哀與其奢也寧過於儉雅不合乎中要皆過之小者耳過之小而有補於世道雖過也夫何傷否則雷之過於山也豈真小哉特以山之高而小其声耳君子之道豈真有小者哉以恭哀儉而時有可過焉耳故彖傳曰小過利

貞與時行也苟非其時雖三者之善亦可以過之  
小大論哉

陽明先生夜宿天池月下聞雷次早詢之知山下  
大雨詩云昨夜月明峯嶺宿隱隱雷聲在山麓曉  
來却問山下人風雨三更捲茅屋觀此亦可以証  
山雷小過之象

水存火上既濟君子以思患而豫防之

水在火上既濟火炎上也降而居水之下斯足以  
烹夫水水潤下也升而居火之上斯足以受火之  
烹水火交而烹能之功成此既濟之象也君子觀

象既濟以思患而豫防之夫時當既濟人事既以善矣天運既以昌矣民康物阜亦可以享昇平共安樂矣然治者亂之潛安者危之伏物極必反理數然也况百事純緒則玩愒易生而懷宴安者亦人情之常於此不慎怨怠荒一滋則侈靡莫救火固足以烹水而過燥即為臭灼之虞水固賴火以烹而稍溢即成淹滅之禍其必觀坎之陷而思其患因離之明以豫其防凡所以儆戒無虞者無所不至則患雖伏於後防已設於先庶乎既有未然之防永彌將然之患而既濟可永保矣况泉有終

亂之窮又有濡首之厲古之致治未亂保邦未危如虞廷統業上下交相倣效孰非是道哉易六十四卦惟既濟一卦坎上離下六爻之陰陽與六位之陰陽相協故雜卦傳曰既濟者定也大象正示以常定之法

火在水上未濟君子以慎辨物居方

火在水上未濟水必賴火以濟餘也水火不交則不相為用斯為未濟之象未者有所符之辭非不濟也慮未濟而必求其濟者謂非君子之心乎故以慎辨物居方彼炎上火之性也而其炎實可以

濟矣水潤下水之性也而其寒必有資於火此物之所當辨者居之有不慎則終於未濟而已矣辨象火之明居象水之聚處水火之交不容不慎是故本吾敬慎之心辨之必明而深濕之不濕居之各當而烹飪之相宜即其性之炎者以下於水則其燄為不虛即其性之潤者以上於火則其寒為可熱是而不相能者而兩相濟焉於以突理陰陽參贊化育皆於此乎在也可不慎哉要之水火不相射者天之道也水火交相濟者人之事也君子所當慎辨而居方者推類固萬有不齊而水火相

濟乃功用之最大者以人事濟天道此固其一端也噫以此反身而慎其獨焉洗心退藏發禁燥妄以忍水制慾火惟辨之早斯居之安也是故必如此而後為君子之善用易